

ISI ROT BILONG GOD BILONG KISIM BEK MANMERI LONG PE BILONG SIN

Pren Bilong Mi: Mi laik askim yu long dispela wanpela, nambawan askim, em i winim olgeta arapela askim bilong laip. Amamas bilong yu, o hevi bilong yu oltaim oltaim, bai i stap long bekim bilong yu nau. Askim em i olsem: **God i bin kisim bek yu o nogat?** Dispela askim i no askim long ol gutpela pasin bilong yu, o sapos yu memba bilong sios, nogat. Askim, em i olsem: **God i kisim bek yu pinis o nogat? Yu save tru tru olsem taim yu dai, bai yu go long heven o nogat?**

God i tok: sapos yu laik i go long heven, yu mas kamap nupela gen [olsem pikinini]. Long Jon 3:7, Jisas i bin tokim Nikodimas olsem, “... **Yu mas kamap nupela gen** [olsem pikinini].”

Long Baibel, God i givim yumi rot bilong *kamap nupela gen, o, rot bilong kisim bek manmeri*. Dispela rot bilong God i isi. God inap **kisim bek** yu tude. Olsem wanem?

Pren bilong mi, pastaim, yu mas luksave olsem, **Yu sinman tru**. Long wanem, Baibel i tok olsem, “... **olgeta manmeri i bin mekim sin na ol i kamap sot long mak bilong glori bilong God**” (Rom 3:23).

Dispela pasin bilong mekim **sin i kotim yu pinis na yu mas i dai**. Baibel i tok gen olsem, “... **pe bilong sin em i dai...**” (Rom 6:23). **Dispela dai bai i kisim sinman i go long ples hel (hul paia), na em bai i stap longwe long God inap oltaim oltaim.**

Baibel i tok gen olsem, “... **God i makim wanpela taim bilong ol man i mas i dai. Na bihain long dispela i gat kot**” (Hibru 9:27).

Tasol Papa God i laikim yu tumas **na Em i givim dispela, wanpela Pikinini tasol bilong Em, Jisas, bilong karim sin bilong yu na i dai long ples bilong yu** (long diwai kros). Tok bilong Em yet i tok, “... **dispela Man i no bin save long sin, God i bin mekim Em i stap sinman tru bilong helpim yumi. Olsem na yumi ken kamap stretpela pasin bilong God insait long Kraist**” (2 Korin 5:21).

Jisas i bin kapsaitim blut bilong Em na Em i dai. Baibel i tok, “**Blut i save givim laip long olgeta man...**” (Wok Pris 17:11). “... **Na sapos blut i no kapsait, i no gat rot bilong tekewe sin**” (Hibru 9:22).

“**Tasol God i soim Em i laikim yumi tru olsem, taim yumi stap sinman yet, Kraist i bin i dai bilong kisim bek yumi**” (Rom. 5:8).

God i tok olsem Em i bin putim ol sin bilong yu na ol sin bilong mi antap long Jisas na Em (Jisas) i bin dai long ples bilong yu na mi bilong kisim bek yumi. Em i bin kamap sinman tru bilong kisim ples bilong yumi long diwai kros. Dispela em i tru. God i no inap giaman. Dispela samting God i mekim bilong yumi, yumi no inap tru i save long en, tasol i tru Em i mekim.

Pren bilong mi, God “... **Em i givim strongpela tok long olgeta man long olgeta hap graun olsem, ol i mas tanim bel**” (Aposel 17:30).

Dispela pasin bilong tanim bel em i olsem pasin bilong senisim tingting. Yumi mas i wanbel wantaim God olsem yumi wanwan man em i sinman. Tu, yumi mas wanbel wantaim God olsem Jisas i bin mekim wok antap long diwai kros bilong kisim bek yumi.

Long Aposel 16:30-31, man bilong lukautim kalabus long Filipai i bin askim Pol na Silas, “... **Tupela bikpela man, mi mas mekim wanem samting na bai God i kisim bek mi? Na tupela i tok, Yu mas bilip long Bikpela Jisas Kraist na bai God i kisim bek yu...**”

Bilip tasol long Em olsem man husat i bin kisim sin bilong yu, na i dai long ples bilong yu. Bilip olsem ol i bin planim Em long matmat na God i bin kirapim bek Em.

Dispela kirap bek bilong Jisas long matmat i strongpela mak tru bilong strongim bilip bilong ol manmeri husat i bilip long Em. Na ol i ken save olsem bai ol i kisim laip i stap gut oltaim oltaim, sapos ol i bilip long Em olsem Em wanpela tasol i Man bilong kisim bek ol.

“**Tasol olgeta man i kisim Em, Em i givim namba long ol, bai ol i ken kamap ol pikinini man bilong God. Yes long ol man i bilip long nem bilong Em**” (Jon 1:12).

Baibel i tok, “**Long wanem husat i singaut long nem bilong Bikpela, bai God i kisim bek em**” (Rom 10:13).

Dispela hap tok “husat” i karamapim yu, na dispela hap tok, “bai i kisim bek,” em i no tok ‘ating’ o, ‘em inap’, nogat. Dispela hap tok i tok stret olsem God bai i kisim bek yu.

Tru tumas, yu yet i save olsem yu sinman. Nau tasol, long hap yu stap long en, yu ken senisim tingting bilong yu [tanim bel] na litimapim bel bilong yu i go long God long prea.

Long Luk 18:13, dispela sinman i bin prea olsem, “... **God, Yu mas sori long mi, mi wanpela sinman.**” Yu ken prea wankain olsem: “**O, God, mi save olsem mi sinman. Nau mi bilip olsem Jisas i bin kisim ples bilong mi long diwai kros. Mi bilip tu olsem blut bilong Em i bin kapsait bilong mi; na dai, na matmat, na kirap bek bilong Em tu, Em i bin mekim bilong helpim mi. Olsem na nau mi kisim Em olsem Man bilong kisim bek mi. Tenkyu long**

lusim olgeta sin bilong mi, na givim mi dispela presen, em i laip i stap gut oltaim oltaim, long wanem yu God bilong marimari tru. Amen.

Nau tasol yu mas bilipim tok bilong God na kisim dispela laip i stap gut oltaim oltaim. Bilip na bai God i kisim bek yu. I nogat wanpela sios, o arapela lain, o ol gutpela wok yu wokim inap kisim bek yu. **Tingim, God tasol i save kisim bek man. Em tasol!**

Dispela rot bilong God bilong kisim bek manmeri long pe bilong sin i olsem: Yu sinman (meri). Olsem na sapos yu no bilip long Jisas, Husat i bin dai long diwai kros bilong kisim ples bilong yu, bihain long dai bilong yu, bai yu go long hel (hul paia) na stap oltaim oltaim. Tasol sapos yu bilip long Jisas, Em i bin dai, na ol i planim Em, na Husat i bin kirap bek long matmat bilong kisim bek yu, bai God i lusim ol sin bilong yu na bai Em i givim presen nating long yu; **Em laip i stap gut oltaim oltaim, long bilip bilong yu tasol.**

Ating bai yu tok, “Tru tumas, dispela em i isi tumas.” Yes, em i isi! Na em i tok tru bilong Baibel. Em i we (rot) bilong God bilong kisim bek manmeri. **Pren bilong mi, yu mas bilip long Jisas na kisim Em olsem Em wanpela tasol inap long kisim bek yu.**

Sapos dispela rot bilong God i no klia tumas, mi laik bai yu ritim gen dispela liklik hap pepa. Yu noken malolo long ritim dispela liklik hap pepa inap long taim dispela toktok i klia long yu. Yu mas save olsem, tewel (soul) bilong yu i dia tumas na em i winim ol arapela samting bilong dispela graun.

Baibel i tok, “. . . sapos wanpela man i kisim olgeta samting bilong dispela graun na lusim tewel bilong em yet, bai dispela i helpim em olsem wanem?” (Mak 8:36).

Yu mas save tru olsem God i kisim bek yu pinis. Sapos tewel (soul) bilong yu i lus olgeta, bai yu i no inap i go long heven. Olgeta samting yu wok hat long en bai i lus wantaim tu. Mi askim yu long bel bilong mi tru, **Larim God i kisim bek yu nau tasol.**

Pawa bilong God yet bai i kisim bek yu, na lukautim yu, na mekim yu i stap strongpela Kristen. Long wanem Baibel i tok, “. . . I no gat wanpela traim i bin kamap long yupela, na dispela i narakain long ol traim i save kamap long olgeta man. Nogat. Tasol God i stap Man yu inap bilip long Em. Na Em i no larim wanpela traim i kamap long yupela inap long winim strong bilong yupela. Tasol bai Em i wokim rot, bai yupela i ken ranawe long dispela traim, bai yupela inap sanap strong long en” (1 Korin 10:13).

Yu noken bilip long laik bilong yu yet, long wanem ol laik bilong man i save senis klostu klostu. Bilip bilong yu i mas sanap long ol promis bilong God. Ol promis bilong God i no save senis. Bihain long taim God i kisim bek yu i gat tripela samting yu mas wokim olgeta de bilong kamap strong long laip bilong yu wantaim God. **Beten** – yu toktok long God. **Ritim Baibel** bilong yu – God i toktok long yu. **Telimautim Gutnius** – yu tokim ol arapela long God.

Bilong soim bilip bilong yu long ol arapela, na soim olsem yu bihainim tok bilong Bikpela Jisas Kraist, **yu mas kisim baptais.** Kwiktaim tru, yu mas go lotu long sios we ol brata na susa i bilip tru na bihainim tok bilong God. **“Olsem na yu no ken sem long testimoni bilong Bikpela bilong yumi . . .”** (2 Tim. 1:8).

Baibel i tok, **“Olsem na wanem man i autim nem bilong Mi long ai bilong ol manmeri, bai Mi tu autim nem bilong en long ai bilong Papa bilong Mi i stap long heven.”** (Matyu 10:32).

Pidgin #161

Copyright: Lifegate Inc., 2007